

## **INFORME ANUAL 2025 DO GRAO DE CUMPRIMENTO DOS ACORDOS APROBADOS NO PARLAMENTO DE GALICIA NA XI LEGISLATURA**

O control da acción do goberno polo Parlamento é un dos piares fundamentais sobre os que se sustenta o estado de dereito e a esencia mesma da democracia. O Estatuto de Autonomía de Galicia establece no seu artigo 10.1 as funcións que lle corresponden ao Parlamento de Galicia sinalando como unha delas no seu apartado b) a de "controlar a acción executiva da Xunta".

A Lei 1/2016, do 18 de xaneiro, de transparencia e bo goberno, no seu artigo 19, relativo á información específica sobre as relacións da Xunta co Parlamento de Galicia, establece que a finais de cada ano, a Xunta de Galicia elaborará e publicará no Portal de transparencia e Goberno aberto un informe respecto do grao de cumprimento dos acordos aprobados polo Parlamento nese ano.

O fin último e principal obxectivo desta Lei 1/2016 é dar cumprimento a un deber fundamental, encomendado polo Estatuto de Autonomía de Galicia, que é o de facilitar a participación de todos os galegos e as galegas na vida política.

Un dos principios reitores da Lei de transparencia de Galicia é o de publicidade activa como medio para fomentar o exercicio da cidadanía do seu dereito fundamental á participación e ao control sobre os asuntos públicos. Calquera control público da actividade das institucións debe ser un obxectivo a cumprir por todas as administracións e un reto para todas as institucións.

Pola súa banda, o Regulamento do Parlamento de Galicia dedica o Título XI á regulación das proposicións non de lei (artigos 160 a 162) e o artigo 151 do Título X ás mocións subseguintes ás interpelacións, iniciativas de impulso das que emanan a meirande parte dos acordos que adopta o Parlamento e que atinxen ás competencias da Xunta de Galicia.


En consecuencia, neste contexto e en cumprimento da normativa vixente, emítese na Comunidade Autónoma de Galicia o presente informe referido aos acordos adoptados polo Parlamento no pasado ano 2025, no que respecta ás Proposicións Non de Lei e ás Mocións aprobadas.

No devandito ano 2025 resultaron aprobados un **total de 209 acordos**, tanto en sesións plenarias como nas distintas Comisións parlamentarias. Exponse a continuación un detalle dos acordos aprobados, segundo o grupo parlamentario que promoveu o seu impulso:

AUTORES	EN PLENO	EN COMISIÓN	TOTAL	% SOBRE O TOTAL APROBADAS
<b>PdeG</b>	33	114	147	70,33%
<b>BNG</b>	4	33	37	17,70%
<b>SdeG</b>	5	20	25	11,96%
<b>TOTAL APROBADAS</b>	<b>42</b>	<b>167</b>	<b>209</b>	<b>100%</b>

### Acordos aprobados por grupos parlamentarios

■ Grupo parlamentario de Goberno    ■ Grupos parlamentarios da oposición



Cómpre indicar que está dispoñible no Portal de Transparencia a relación de todos os acordos aprobados, na seguinte ligazón:


<https://transparencia.xunta.gal/outras-organizacions/relacions-xunta-parlamento>.

Do total de 209 acordos aprobados nas sesións parlamentarias celebradas durante os dous períodos de sesión do ano 2025 **na data de elaboración do presente informe están cumpridos ou en proceso de cumprimento un total de 206**, o que reflicta este grao de cumprimento é unha porcentaxe do **98,56%**. O compromiso do Goberno galego é dar cumprimento á totalidade dos acordos acadados no Parlamento de Galicia.

A continuación inclúese un cadro e unha gráfica dos acordos acadados segundo a temática que abordan:

ACORDOS PARLAMENTARIOS SEGUNDO TEMÁTICA	APROBADOS		% Cumprimento
	Nº	%	
Apoio aos sectores productivos, dinamización industrial e protección do emprego	77	36,84%	98,70%
Infraestruturas de abastecemento, de comunicación e mobilidade, telecomunicacións	26	12,44%	96,15%
Cultura, patrimonio e defensa da lingua	15	7,18%	100,00%
Impulso da transparencia, facenda, contratación pública e función pública	14	6,70%	100,00%
Protección do medio ambiente, ordenación urbanística e vivenda	14	6,70%	100,00%
Sanidade e saúde pública	13	6,22%	100,00%
Ensino	11	5,26%	100,00%
Familia, infancia, dependencia e discapacidade	10	4,78%	90,00%
Igualdade e loita contra a violencia de xénero	9	4,31%	100,00%
Administración de Xustiza	8	3,83%	100,00%
Apoio ao sector turístico	5	2,39%	100,00%
Deporte	3	1,44%	100,00%
Outros	2	0,96%	100,00%
Apoio aos concellos e Administración Local	2	0,96%	100,00%
<b>TOTAL</b>	<b>209</b>	<b>100,00%</b>	<b>98,56%</b>

## ACORDOS PARLAMENTARIOS SEGUNDO TEMÁTICA



Da análise do contido dos acordos parlamentarios acadados neste ano 2025 e tendo en conta a temática abordada neles, cómpre subliñar a destacada presenza daqueles referidos ao apoio aos distintos sectores produtivos con especial incidencia no desenvolvemento rural e actividades agrogandeiras e forestais, actividades pesqueiras e do mar, sector enerxético, comercio, así como á dinamización industrial e á protección do emprego en Galicia. Un total de 77 acordos aprobados, sendo o nivel de cumprimento neste ámbito do 98,70 %.

Particular relevancia teñen, os 26 acordos adoptados en materias vinculadas ao desenvolvemento de infraestruturas de abastecemento e de comunicación, impulso da mobilidade e da seguridade viaria. Neste ámbito, o grao de cumprimento dos acordos acada o 96,15 %.

Subliñar en segundo lugar os acordos adoptados en materias vinculadas á cultura, patrimonio, e defensa da lingua un total de 15. Neste ámbito o grao de cumprimento, ou en proceso, dos acordos acada o 100%.

Finalmente, cómpre ter en conta que aínda que os acordos parlamentarios diríxense á Xunta de Galicia como instancia de impulso, non sempre é a autonómica a administración responsable final da execución das propostas, de acordo ás competencias que ten asumidas.

<b>PROPOSICIÓN DE LEI E MOCIÓN APROBADA (pola administración ou entidade á que se insta)</b>				
<b>Entidade</b>	<b>Aprobadas</b>	<b>% Aprobadas</b>	<b>Cumpridas/en proceso</b>	<b>% Cumpridas/en proceso</b>
<b>Goberno central</b>	116	55,50%	116	56,31%
<b>Xunta de Galicia</b>	84	40,19%	81	39,32%
<b>Compartidas</b>	7	3,35%	7	3,40%
<b>Administración Local</b>	2	0,96%	2	0,97%
<b>Total</b>	<b>209</b>	<b>100,00%</b>	<b>206</b>	<b>100,00%</b>

Así, mais da metade dos acordos (55,50 %) veñen referidos a competencias de xestión correspondente ao Goberno do Estado. O 40,19 % corresponde á Xunta de Galicia e nun 3,35 % dos casos as responsabilidades son compartidas, implicando ás distintas administracións (Xunta de Galicia, Goberno do Estado, Unión Europea). A estes engádenselles outros acordos que atinxen ás competencias da Administración local.